

摘藻堂四庫全書薈要

集部

欽定四庫全書薈要

集部

元詩選初集卷八



詳校官候選知縣臣吳甸華

欽定四庫全書薈要卷二萬三百六十八集部

元詩選初集卷八

長洲

顧嗣立編

牟巖陵陽集



巖字獻之其先蜀人徙居湖州宋端明學士子才
之子擢進士第官至大理少卿子應龍咸淳進士
元初起教授陵陽州以上元簿致仕當宋亡時獻
之已退不任事矣一門父子自為師友討論經學
以義理相切磨應龍遂以文章大家見推於東南

是時宋之遺民故老伊憂抑鬱每託之詩篇以自明其志若謝皋羽林德陽之流邈乎其不可攀矣其他仇仁近戴帥初輩猶不免出為儒師以升斗自給獻之以先朝耆宿皜然不緇元貞大德之間年在耄耄歸然備一時文獻為後生之所矜式所著陵陽集若干卷次子帥府都事應復所編國史編修程端學為之序謂其出處有元亮大節正不當徒以詩律求之也

東坡九日尊俎蕭然有懷宜興高安諸子姪和
淵明貧士七首余今歲重九有酒無肴而長兒

在宜興諸兒蘇杭溧陽因輒繼和

錄三

驚飈舉落葉意氣何軒軒秋高百卉盡寂寞但空園何
異富與貴變滅隨雲煙緬懷陶彭澤平生極幾研朗詠
貧士詩相對如晤言今人之所恥古人以為賢

翁媼老白髮蕭然老江干大兒荆溪游折腰豈為官諸
兒走異縣亦各營一餐別多會面少端復坐飢寒諸幼

且眼前笑語開我顏勿問賢與愚懷抱俱相關

好惡豈不察鑿垣植蒿蓬而此庭前菊鋤灌少人工此
物抱至潔有似楚兩龔留香待嚴凜意與烈士同糞土
笑伯始金錢鄙鄧通千載一元亮舍此將安從

題淵明圖

并序

淵明九日無酒坐宅邊菊叢中意殊寂寞江州刺
史王茂弘諸孫已荷朝寄猶知有賦歸去來者能
於此時遣白衣擔酒遠餉邂逅一醉大是奇事集

中九日詩僅兩首無酒則曰塵爵恥虛罍寒花徒
自榮有酒則曰何以稱此情濁酒且自陶而王弘
所餉已酉九日十有餘年略不見於詩何邪此翁
志節耿亮與秋俱高往往逃於酒而寓於菊二詩
之作一感一喜微見於意固不暇於歲歲皆詩此
中有真意欲辨已忘言正當求之言句之外可也
此幅筆雖簡意有餘輒和已酉九日韻述其事醉
中看畫未免發千古一笑

平生抱耿介四海寡朋交
妻其九日至頗感顏髮凋
無酒醒對菊風味乃更高
誰識此時情白雲行遠霄
地主有佳餉得得良已勞
而我適邂逅赴飲如沃焦
永言大化內朽質非所陶
惟有飲美酒一醉可千朝

和趙子俊秋日閒居二首

窘步殊蹢躅戶限久不踰
若或繫維之媿彼空谷駒
俛焉念平生我亦酷信書
所得不償失每與憂患俱
飲水飯脫粟此意豈願餘
貧實為我累舍貧將焉如
堪嗟嗜

利者死甘謚為愚

九日忽已過霜薄陽光晞未漉頭上巾先典篋中衣時
物尚有菊採掇頓爾稀對酒胡不飲坐看白日飛五勝
更囚旺萬事誰是非且復進一觴酒盡情依依晚蜨抱
孤藥無乃昧先幾

和無逸子敬獨姥山

維址呀洞戶雲氣一縷煙老龍蓄精祐萬石護其顛從
此叩林屋倒翻水中天金庭漫隔凡窮探未擬旋車轉

四面動兀坐孤寂然頗疑北山脈跨湖潛屬聯歸來夢
所歷跳波撼晝眠種橘化為枳我髮日已宣何時菴邊
路去伴毛公仙獨姥舊聞名俚俗訛已傳一朝得妙語
塗抹乃更妍天姥似失色葉姥休語年而我復自笑槁
乾非葉鮮聊以調二士鼓棹還延緣

贈俞山月

童奴從長耳萬里聲蕭騷歸從半山路問字良亦勞卧
聞餓虎嘯喚醒平生豪前山忽湧月始覺所見高欣然

有遠孫載酒江湖教曾中湛水鏡邂逅得所遭古月還
相照了不隔秋毫但憐露草濕時復莫蟲號

長江圖

漢川影落鸚鵡洲金山鐘到多景樓老龍幾載卧寒碧
中間不斷萬古流晚來雪浪大如屋澎湃舞我一葉舟
舟移岸轉知何處離離煙草令人愁說與渠儂莫倚柁
轉帆別浦盍少休此圖此景俱可惜展玩不足空白頭
家在江水發源處何時還我舊菟裘

善之入雪蘭皋置酒小詩紀坐中事

病翁禁酒仍禁脚不省人間有行樂主人最善客善之
邀我来同鷄黍約清樽快吸船落埭頗悔從前謝杯杓
故人久別如此酒一時傾倒慰離索更擘新筍供春淘
狐泉槐葉未須學髮勤入鼎資過熟老饕恣吞不勞嚼
人生難得是合併開口一笑良不惡呼車載我雨中歸
阿香推車散飛雹分明戒我輕破戒故把春衫都濕却
我亦投牀作雷吼無數殘紅枕邊落

贈厲白雲上人

雙徑聞鐘罷而今但熟眠事須紅日上身在白雲邊古
貌應違俗高吟不礙禪爐頭煨芋火相對各欣然

仲實韶父過訪有詩奉和

重脰嫌卑濕那堪暑雨稠拋書事藥裏歌枕聽溪流何
用攄孤憤惟宜號四休誰能訪生死天際有來舟

和雨中

但聽四簷滴真成萬事休空村就誰飯高樹繫吾舟那

忍田翁笑還憐木偶流老人渾忘事略記酉年秋

和劉朔齋海棠

人物當今第一流以花為屋玉為舟曉妝未許褰幃看
夜醉何妨秉燭游錦里宣華思舊夢黃州定慧起新愁
何如歸伴徐公飲穩結一巢花上頭

七兒應復同客飲櫻桃園摘新歸以遺親用其
詩韻識所感

尚記當年薦寢園百官分賜荷恩寬帶青絲籠空餘夢

搔白頭人苦不歡詩老誇稱作崖蜜野翁驚看瀉銀盤
南山見說紅千樹鳥雀兒童任入闌

春雪

一冬只辦作嚴寒翦水飛花事竟難閉戶不知春意動
撲窓忽覺雨聲乾頗聞萬畝正雲集何處一蓑如畫看
但喜畦蔬得蘇醒從今小摘有餘懽

和徐容齋正旦

想見新年試筆時風流應不減丘遲歸來燕子元相識

落盡桃花若未知何事蘭亭修禊樂便懷墨客感秋悲
湖山勝踐無繇共禪榻茶煙老鬢絲

歲在丙辰元日立春是時先人守當塗郡齋賓
客雲集皆用元祐八年東坡和王仲至秦少游
詩故事所謂省事天公厭雨回先人笑曰天公
省事今乃多事邪今三十九年矣追念慷慨小
詩聊記當時笑談之語

一昨姑溪歲丙辰老仙元日去班春當家句子頻催客

省事天公却笑人紫鳳天涯今已老泥牛歲首又還新
笑談誰記當時語獨立東風倍愴神

和趙君實宣慰

平生知舊

一作我

一季及別后長

一作牢

闕白板扉偶有客

來孤鶴起也無人覺小舟歸儘渠

一作從教

俗子頻相惱只

恐仙禽未肯飛莫笑鑿琴并煮鶴

一作莫怪近來書問絕

醉眠林

下兩忘機

溪邊釣船

莫出前溪去隨宜下釣鉤風波苦不惡鱸鰕滿船頭

題東李博山園二十韻

錄四

雲卧不禁冷誤把岳局觸翻動若木枝紅光被空曲

東壑

倚闌發長嘯援筆記舊游想見同來者俱非第二流

第一

溪

窮鱗無處避網罟如雲密悠然釣臺畔袖手看落日

釣臺

此處若為闕自來還自去中有無心人不妨相伴住

雲闕

相如撫琴

不負百年心琴中託意深如何渾忘却猶費白頭吟

餞高仁卿農丞奉使還北

別來五度見重陽草草賓朋共此觴聽得酒邊新句子
可人風味故難忘

舜舉馬

常得奚官翦拂齊也思驤首一長嘶好隨便面章臺去
柳色如煙路不泥

四安道中所見六首

蒼涼初日破林霏幾度言歸今得歸兀兀籃輿續殘夢
門前兒女挽人衣

生怕秋蟲稻把稀腰鎌爭出傍晴暉
兀高首下泥中鶴啄得黃雲盡始歸

木瓜已過折山來黃帕封林未敢開想見白沙紅照裏
繡紋磊落見奇瑰

木瓜園入折山數里供進后方敢賣
土人取瓜埋其半于沙中以紙鏤花

貼上以溪水洒
之日曬乃紅

聽得荒鷄第一鳴吹燈發火飯初成衣囊減盡渾無袂

又是蕭蕭帶雨行

人向長安渡口歸
長安不見但雲霏
只應白鷺曾相識
船到前頭更不飛

姑溪小隊帶薰風
笳鼓歡迎鶴髮翁
三十九年成一夢
幾多陳迹淚痕中

倦書圖

誰道春酣雨不禁
蒙籠眼色透雲屏
著人花氣深于霧
却是三郎睡未醒

送婁伯高游吳

桃花水暖清明前長堤柳色青如煙
男兒年少重意氣春風買醉吳江船
西湖三月春更好笙歌錦繡神仙島
紫燕樓深翠黛間碧羅天淨楊花老
興亡往事置勿論千金不惜酌歌尊
酒酣莫作後庭曲游人思斷江南魂
去去知君訪陳跡吳水吳山青歷歷
花殘鈿碎館娃空春草年年為誰碧
君行正樂我為愁白髮送君思舊游
平生漫浪無侶我努力功名須黑頭

戴表元剡源集

表元字帥初一字曾伯慶元奉化人宋咸淳中登進士乙科教授建康府遷臨安教授行戶部掌故國子主簿皆以兵亂不就元成宗大德八年表元年六十餘矣執政者薦之除信州教授再調婺州以疾辭其後翰林集賢以修撰博士交薦不起卒年六十七所著有剡源集行世宋季文章氣萎蕭而辭翫跛帥初慨然以振起斯文為已任時四明

王應麟天台舒岳祥並以文名海內帥初從而受業焉故其學博而肆其文清深雅潔化陳腐為神奇蓄而始發間事摹畫而隅角不露尤自秘重不妄許與至元大德間東南之士以文章大家名重一時者帥初而已宋景濂曰濂嘗學文于黃文獻公公於宋季詞章之士樂道之而弗已者惟剡源戴先生為然性好山水每策杖遊眺遠不十里近才數百步不求甚勞意倦輒止忘懷委分或自稱

質野翁充安老人云帥初之序松雪集曰古之相知必若韓孟歐梅同聲一迹綢繆傾吐而後為遇而後世乃欲望此於道途邂逅之間則又過矣帥初之於子昂其相引為知心者如此然子昂以仕顯從容諷議而帥初類多傷時閔亂悲憂感憤之辭讀者亦可以諒其心矣

次韻荅朱侯招遊海山

江南春草黃江北秋鴈飛窮居念還往故物悉已非我

有青雲交山林可同歸十年學撫琴對客輒累歛豈不
願和悅調苦心易悲青天無古今白日相因依向來炎
炎人所得一何微成者化埃塵不成翻禍機玉美受雕
鐫馬良遭絆轡所以曠達士但貴知我希請休接輿歌
且急梁鴻噫名微少士責身閒免官譏寧無一日力相
尋盡嶮崎霜魚碧玉鱸水菊黃金暉君歌我按筑我舞
君攬衣此日為君歡醉遊敞船扉

題陳高士所藏冬青枝上白頭翁畫

飛高得珍叢青子飢可食不知何憂愁二鳥頭亦白道
人天機深清齋意相許賴汝不能鳴一鳴嫌殺汝

浴蠶沙溪水一首為上饒陳烈婦作烈婦信州
上饒人嫁同郡葉氏年二十五生子四齡而寡
丙子兵寇起能以智全其家歲飢發粟賑貧類
大丈夫慷慨知大節非徒守閨門貞行而已有
司上其事賜旌表蠲復如法

浴蠶沙溪水采桑玉山巔絲成白稜稜膠作烈婦絃烈

婦何所言絃中意纏絲一說驚影孤二訴離巢穿巢穿
尚可葺影孤恨終天有食不自肥衆禽仰喉咽真宰憫
其疲勞役盡弛蠲及今雖長成雖舉亦翩翩朝陽照巖
林枯槁生光妍黃蘗誰謂苦鐵石誰謂堅請君屏俗耳
聽我沙溪篇

書歎七首

王生困縲紲

泳道

劉子急徵追

正仲

舒叟挈家走幾遭鞭與

笞

東野

我無三人辱閉門但窮飢飽死世更多徒憂何以

為敢作小夫歎聊為才士悲

舒子高品藻王生怪衣冠處世那得耳
饒饒真自殘劉子最多愛逢人傾肺肝
勸我學其道縮身可泥蟠胡為亦不免
念此坐長歎

英英天上星碌碌澗中石升沈雖不同
精爽或相激我有知名友四海邯鄲壁
子昂遭逢不相閔頗為談者惜談者自不知
斯人寧易得

表弟豁達人陳兄靜默士平生少附麗
頗與同憂喜邇

來怪事發談笑不可擬一為脫淵魚一為墜柯蟻吁嗟
其奈何天運固如此

數友越州居無書已三年台州已無數逢人每相賢日
夜憶遠友遠者隔蠻煙風氣不擇州俗情輕目前管鮑
死何處寄酒灑其阡

結友何用多管鮑無三人讀書何用博得少全其身君
有狗名子擾擾趨風塵朝逐富兒餐莫聯豪士茵歸來
反如客魚鳥亦相嗔

蘇州米空熟越州人不來
緩急托遠婚不如傍蒿萊
蒿萊在籬落為我障浮埃
生女屬他人生男尚嬰孩
從何得饘粥作此聊自咍

君莫誇少年一首贈余光遠

君莫誇少年與我憊者疎
我亦常少年少年君不如談
諧今已忘猶有少年餘
東南山水國蚤得飛長裾
春園虎丘樹夏檻玉泉魚
吳妍與楚豔過眼日千車
當此春風一作秋氣淒遊子易欷歔
我時未更事意氣益發舒
出門

有佳侶遇勝不得虛惟憂日晷短當去亦躊躇官曹人所厭高士不肯居平生縱觀處最在客南徐姻黨四面集綵衣擁安輿停觥待淮蟹醇甘逮僮胥道路無此願此願勝鄉間自從秣陵歸鬱鬱不再攄三間風雨屋僻在荒林墟非君好事者誰能至吾廬今來建溪上逢君屢相於行藏且勿問人世有乘除舊狂吾已悔新銳君當祛男兒不用世資身在犁鉏臨風贈君別勸君惜居諸勸君重桑梓勸君重名譽歲晚未相忘頻寄山中書

老樹

老樹老且枯數柯枝綴之蟲來食其葉藤來纏其皮幸
然根本堅未至甚離披風霜既無損雨露猶見私如何
烏鳥輩同巢自傾危關擊翼似斧啄傷背如錐樹色歲
時減樹力日夜衰回首試一顧但可相扶持

伯收東岡麥

伯收東岡麥仲移西塍秧四季各有役餬口走皇皇豈
不惜冠履兼營業縑緇憐爾衣食微及茲筋力强古來

經術士什九起耕桑窮通自天命謹勿事胥商

鄰峰

霜嚴火炬青月淡兩峰白堂堂夜行誰鄰峰販醯客販
醯事且止歸農收又薄技擊習鞭撻鮮肥慣烹炙外雖
刑憲拘內實飢困迫鹿窮有狂奔虎斃猶怒擲如何隴
上豪坐作溝中瘠世無卓魯化名在跼蹐籍感歎重徊
徨羈危轉驚赫

次韻焦治中雲洞紀遊十四韻

是身虛空中如雲本無有遊行又其寄縱樂安得久嵌
巖大魄質鑱削奇鬼手棟宇起何年名稱出誰口憶昔
扳藤蔓凌空訝雞狗踈踈石生竅剡剡室懸斗乘峻開
棧梯緣明挂窓牖豈無題壁堂多逢斫畬叟賢侯韋平
家雅韻王謝友驪珠百四十模寫已八九坐我南樓牀
澆我北海酒人生主客意如此豈云偶風花命浮沈木
鴈天可否悠然付一噓山靈儻回首

宿福海寺

斲巖蒼龍角汲流紫雲根
道人不絕俗自然無耳喧
屋脊挂修嶺一日過千轅
此中但高卧松風有清言
聽之亦無有風定松在門
炊成我欲去獨鶴鳴朝暾

春風

春風吹愁端散漫不可收
不如古溪水祇望鄉江流
新花紅爍爍舊花滿山白
昔日金張門狼籍餘廢宅
回首語春風莫向新花叢
我見朱顏人多金亦成翁
多金不足惜丹砂亦無益
更種明年花春風自相識

八月十六張園翫月得一字

明河盪殘雲青海收
晚日婆娑林端月為我良久出
洗杯問勞苦天女笑
矜矜月行虛空中萬古無損失
且可娛今宵勿復思
昨日歌情天水遙
坐影人樹密
嗔醒有微酒
微詩或呼筆
仲容歡入林
懷祖嬌在膝
初猶整褐裘
久乃忘冠櫛
趨蹌翻奕盤
笑傲驚帳室
寧來共喧呶
不許私暇逸
蚩蚩復擾擾
醉態不可一
情知此月下
此樂世無匹
月光本天性
清瑩本其質
動定極渟滯
涵聲沈

轉蕭瑟忽忙記醉語悟遲已難述

秋蟲歎

夏蟲聲漸微秋蟲聲漸繁微物何所知時至不得閒嗟
我鏡中髮亦復就彫殘淒然雜憂患霜風埽茅菅反不
如彼蟲自得草莽間所以達生士逃名在空山客居雖
云樂不如蚤知還

赤泥嶺行

種桑三年寒得衣養犢作牛堪挽犂生男祇解戀鄉土

五日溪船催父歸行前倉庾後杜宇去家漸近聞剡語
恨身不作田舍兒騎竹搏沙遠牆戶人生衣飯取裁足
阿奴碌碌猶類福獻書覓舉真下策年少奔馳頭已白
君不見燕山萬里客更難赤泥嶺上春風寒

夜寒行

昨日天寒不成醉今日天寒不成寐醉遲得酒可強歡
寐少愁多頻發喟柴竿葦炬鬧荒城役夫遙作鵲鴨鳴
擁衾高枕未云苦熟聽但覺令人驚烏孫黃鵠飛不返

遼城白骨填未滿胡風蕭蕭吹戍旗居人何如去人遠
丈夫無成霜滿須沙場萬里星河疎南牆詩翁窮據鑪
北窓少年猶讀書

自信上歸遊石門訪故人毛儀卿振卿兄弟作

長句贈之

丙午冬

山開未開白雲梯人行不行青麥溪五年清夢隔蟻穴
千里飛塵深馬蹠重来交遊亦笑樂但覺几杖煩提攜
門間霜葉無數積風定水禽時一唳藥草春暄夜更長

木蘭花下聽天雞

昨日行

種樹莫種垂楊枝
結交莫結輕薄兒
楊枝不耐秋風吹
薄交易結還易離
君不見昨日書來兩相憶
今日相逢不相識
不如楊柳猶可久
一度春風一回首

招子昂飲歌

與君相逢難草草
與君相逢苦不早
人生何處少泥塗
此日飄零武林道
武林城中馬如雲
閉屋狂歌人不聞

狂歌自笑君亦笑依然狂絕不如君君歌豈是真狂者
青衫少日春瀟灑至今俊筆五花紋最惜青眸十行下
虛名何用等灰塵不如世上蓬蒿人黃金偏趨不貧室
白髮難老無愁身風雨無情亦如此淒淒但聒窮人耳
不見朱樓高到天鳳簫龍管連朝起連朝笙管可奈何
我歌且止須君歌青天白雪望不極坐見綠水生層波
我生何為被狂惱江頭魚肥新酒好從今作樂拚醉倒
與君相逢難草草

剡民飢

剡民飢山前山後尋蕨其斲其得粉不滿掬皮膚皴裂
十指禿皮皴指禿不敢辭阿翁三日不供糜不如拋家
去作挽船士却得家人請官米

採藤行

君不見四明山下寒無糧九月種麥五月嘗一春辛苦
無別業日日採藤行遠岡山深無虎行不畏老少分山
若相避忽然遇藤隨意斫手觸藤花落如蝟藤多力困

一顰伸對面聞聲不見人日昃將來各休息妻兒嬾拂
竈中塵須臾叩門來海賈大藤換糧論斛數小藤輸市
亦值錢糴得官粳甜勝乳明朝滿意作晨炊飽飯入山
須晚歸南村種麥空蚤熟逐日扃門忍飢哭

少年行贈袁養直

我昔如君初冠時見君垂角兒童嬉君今長大一如我
但少頭上斑斑絲誦書如流日千紙更出清言洗紆綺
明珠在側真自失挾冊茫洋吾老矣人言四十當著書

春風半負黃公壚童奴哂笑妻子罵一字不給飢寒軀
儒學無成農已惰履窮始悔知無奈人生少年還易過
請君努力無如我

義蜂行

山翁愛蜂如愛花山蜂營蜜如營家蜂營蜜成蜂自食
翁亦藉蜜裨生涯每當山蜂採花出翁為守闕司徼遮
朝朝莫莫與蜂狎頗識蜂羣分等差一蜂最大正中處
千百以次分來衙叢屯雜聚本無算勢若有制不敢譁

東園春晴草木媚漫天蔽野飛橫斜須臾駢翼致雋永
戢戢不翅輸牛車似聞蜜成有所獻儔類不得先摩牙
重防覆衛自嚴密雖有毒螫何由加一朝大蜂出不戒
春容靚飾修且姱蜻蜓忽來伺其怠搏擊少墜遭蝦蟇
羣蜂倉皇迷所適謁走欲絕聲呀呀求之不得久乃定
復結一聚猶如麻我來訪翁親目睹搏髀不覺長咨嗟
翁言蜂種幸蕃盛衆以義聚尤堪嘉烏衣槐安傳自古
螫觸分據兩角蝸雖云仿佛存國族徒以紀異其詞夸

博勞舅婦恨翼短鼈靈異姓爭荒遐豈如茲蜂互推舉
一體同氣無疵瑕我憐翁言私誚責扶傷蚤媿隋侯蛇
況伊二毒俱下類瑣細不足勞鞭撻前尤往悔俱勿論
事會倚伏來尚賒新房才成蜂未壯舊房委棄隨泥沙

雪後泛湖歌

為阮使君作

君不見明州城中日月湖縈藍繚白如畫圖良時樂遊
古亦有何人破雪浮官厨金猊暖壓紅氍毹紫貂翠拂
青珊瑚塵尾高懸前唾壺使君霜髯雙臉朱同時僚客

總豪秀瑤池閨苑羅仙儒名談鋒湊初不惡安得玉人
歌縷珠似聞州民喜公出終日繞岼狂驩呼淫絃濁管
何足道入耳得此成真娛城尖數峰淡糝糊山郭何路
通樵蘇年年臘前得三白樂歲仍然多餓夫定知新年
稍安樂風流使君江左無

行婦怨次李編校韻

丙子台
州作

赤城巖邑今窮邊路傍死者相枕眠惟餘婦女收不殺
馬上娉婷多少年蓬頭垢面誰氏子放聲獨哭哀聞天

傳聞門閥甚輝赫全家避匿山南巔蒼黃失身遭惡辱
鳥畜羊羴驅入燕平居鄰牆不識面豈料萬里從征鞭
酸風吹蒿白日短天地闊遠誰當憐君不見居延塞下
明妃曲惆悵令人三過讀又不見蔡琰十八胡笳詞慚
貌千年有餘戮偷生何必婦人身男兒無成同碌碌

飛花行贈馬衢州時馬在建舉別業

山上風花山下飛花飛欲盡山翁歸歸來亦自忘行跡
但覺滿地紅依依餘花更惜隨春去溪上遊人山下路

戀家漁父斷來蹤
難老劉郎記前度
花開花落春風前
我昔與翁同少年
祇今鶴去但華表
何處鳥嘯悲杜鵑
遊人自遊春自莫
從翁問花花不語
且當向花日日醉
醉倒花前學花舞

題李伯時畫五馬圖

嗚呼良馬不世出
令人但尋李侯筆
五龍忽墮白雲鄉
海角孤臣看自失
太平天子開明堂
前驅麒麟後鸞鳳
當時此馬來萬里
想見顧盼生風霜
龍眠老仙亦如此

揮毫談笑羣公裏
官閒祿飽少塵埃
霧閣雲窓天上起
風流轉眼餘山河
人間荊棘何其多
臨風卷圖三太息
此馬今存知奈何

看花曲

種花郎君愛花好看花
兒女笑花老牆東花開鬧喧喧
馬蹠蹴碎牆西草遊人賤草只看花
明日重來還可嗟
但見萋迷青覆地
千紅萬紫成泥沙
君不聞明妃當年
辭漢宮黃雲塞下白楊風
一朝邊亭靜烽火詔書自議

麒麟功又不見馬嵬山前玉環血歲歲春風吹不滅詞
人正賞浯溪碑千秋妖恨無人說紅顏悞人何足憐花
開花謝春風前猶勝淒涼後庭樹離歌未斷江南莫

江行雜書

荒城日暮秋江長穠穉野熟秋風香青天茫茫不知處
扁舟卧入菰蒲鄉波深浪靜魚鴨樂遙林墮影同飛揚
平生見畫無此本便欲默寫懸高堂須臾雷雨漲深墨
漁戶悉閉收牛羊篙人軟語似憐我拗蓬蓋頭編篙牀

此時殘暑尚什七瀟灑幸為清蚊蟲無人靜覺物性出
蚯蚓草蟲歌晚涼銅山乳竇青最遠羞縮不似來時妝
但餘田鳥如匹練雙雙飛點暗煙黃山川一日幾變態
人事百年安可常停舟起問魚酒戶此地幾年成戰場
虹梁羽化新起廢白骨無數埋前岡惆悵令人百憂起
飲客正酣歌發狂坐中悲樂誰竟是歸來玉兔搖滄浪

南山下行

南山高北山高行人山下聞叫號旁山死者何姓氏累

累骸骨橫林皋鳥喧犬噪沙草白酸風十里吹腥臊中
有一人稱甲族蔽膝尚著長襦袍不知嬰觸為何罪但
惜貴賤同所遭妻來抱尸諸子哭魂氣滅沒埋蓬蒿人
言投身由寶貨山邨豈得皆權豪一言不訓兵在頸性
命轉眼輕鴻毛龍爭虎鬪尚未決六合一甓何所逃振
衣坐石望太白寒林夜籟聲淅淅

贈趙子實

北風吹沙溪倒飛白日未落山中歸千邀萬覓不相就

誰信有人穿翠微幅巾大帶長襦袍韋篋錦囊鮮綠毫
名門發身合燕頷一經傳家真鳳毛坐車侯嬴吾不讓
白社寒林氣清放駭麟翳鶴誰不能要識神光牛背上
蓬萊山丹霞谷天仙留書三萬軸聞君暫去還復來許
君細和滄浪曲

范文正公黃素小楷昌黎伯夷頌蓋宋皇祐三
年十一月在青社所書以遺京西轉運使蘇公
舜元者也後二百四十年大興李侯戡得此本

於燕及南來守吳乃文正公鄉里即訪公子孫
以畀之范氏喜而索詩為贈

有耳不聽下里巴人有手不寫劇秦美新天生靈物寄
我體可惜委棄同埃塵清風百世希文老一字流傳今
是寶誰知堂堂伯夷頌曾借春暉發枯槁韓子也復英
雄姿冰寒斗峻餘文辭吹噓自起北海隱膾炙聊慰西
山飢天荒地老精靈在處處江湖紅散綵青離孔氏忽
自歸今寓龔侯如有待世情愛古兼愛奇書奴滿眼非

吾師請君焚香盥手拜此帖歸洗人間兒女癡

苕溪

六月苕溪路人言似若邪漁罾挂梭樹酒舫出荷花碧水千塍共青山一道斜人間無限事不厭是桑麻

道桐川欲訪梅右司不知其處

桐川瀟灑處面面碧芙蓉峻塢當關獨清溪抱郭重市多吳客語祠有漢時封欲覓梅仙去知藏第幾峰

和鄧善之秋興二首

鬢髮日夜老神仙那可求揚雄識字苦玄晏著書愁碧
酒紅蓮夜朱絃白鴈秋論心得少暇同上最高樓
鶴化城猶在龍移井未枯百年吾道半六合此身孤西
嶺栽花屋東風賣酒壚佯狂覓耆舊處處土音殊

十二月二十三日華亭小泊華亭近方通潮

一一歌遊處今年又寂寥雞聲生鷗樹蜃氣雜江潮斑
白尋遺老丹青託麗譙衰懷緣子女不憚往來遙

次韻荅應德茂雪後遠寄

山中不來久何處度殘年人悶如中酒邨荒似禁煙將
茶冰箸煮移枕雪篷眠更肯狂歌否春風雙玉船

史昭甫招陳宗魯之長興

之子滄浪去三吳西更西白鹽萼菜膾紅酒稻花雞地
少驚雲滿天空見日低錦一作歸囊看爛熳佳客醉留題

證道寺

彎環青徑斜自是野僧家滿澗瀉巖液插天排石牙鑪
寒餘柏子架靜落藤花記得逃兵日門多貴客車

鄆城火後見光遠

火後丘墟市兵前風雨春
那知攜手地俱是皺眉人
海柳吟猶弱山鷺聽未真
明朝各分路何處避風塵

客言劉樗翁事

薄俗名難盛人窮迹易危
從來天下士不計里中兒
隱玉看虹氣堅松任蠹枝
相知不相識况又不相知

夜坐

愁鬢丁年白寒鐙丙夜青
不眠驚戍鼓久客厭郵鈴
洵

洵城噴海疎疎屋漏星十年窮父子相守慰飄零

久客且歸留別郭于昭憲掾

久客令人厭初春乍許寒飛蓬寬

一作妨

覽鏡脫粟愧加

餐坐有誇羊酪門誰住馬鞍重來會相見老性忍悲歡

頓寒懷單祥卿教諭時新開酒禁

霜花一夜白風葉滿邨黃欲出歲華老相思江水長留
枝遮鵲戶存蜜補蜂糧想見山行處開窓新酒香

蘇伯卿席中領張仲賓所寄二詩兼聞陳無逸

已從湘南官滿歸養喜而有荅仍次來韻

我愛張公子清言氣不低湖溝隨市轉亭樹與城齊
杯酒方花下扁舟又水西祇愁騎馬滑難惜錦障泥

丁丑歲初歸鄞城

城郭三年別風霜兩鬢新窮多違意事拙作背時人
鴈蹟沙場信龍腥瀚海塵獨歌心未已筆硯且相親

社日城南山作

社日年年雨江花處處春漸成垂白老不見踏青人
榆

柳邊聲雜龍蛇歲事新
端來近城郭猶自厭風塵

趙君理約同途不至

待子不來久煙山看樹青
為吟天外句更立水邊亭
雨暖催科斗雲深長茯苓
鄰居亦有約休待鬢星星

同諸子行上畝山

白石秋更潔清溪寒自鳴
牛羊爭道路鳥雀聚柴荆
野果高低熟山田蚤晚耕
吾歸任衰嬾兒輩託平生

己亥歲歸過泉口紫芝山傷謹講師

行路夢猶在入門人已非山青古佛頂雲墨祖師衣賭
奕曾同拙看真似欠肥百年誰免此只合蚤忘機

排律十七韻和阮侯得子

芳城春樹晚清海月弦初瑞世三神島光纏五馬車眼
中新驚驚膝下小璠璣錦褕看爭羨犀顱畫不如試唬
賓錯愕獻夢媼勤渠庭舞張公鶴門填孔氏魚一時官
府慶數世甲科儲聞說衣冠里高增檠戟問民隨阮公
姓鄰禁宛溪漁東去龜浮印南遊雉繞輿陰移棠蒂蒂

騎擁竹舒舒政有兒童戀謠聽父老餘攢眉詢賦額正
色署刑書暗室天如鏡心田老自畬看騎金驄裏待弄
玉蟾蜍我欲歌三賈誰能說兩徐先隨湯餅祝聊當賀
錢醵

杭城風雨中簡子昂

五月錢塘風雨秋懷人頻倚面山樓雲收樹色遙成海
水學江聲暗入溝一斗盡輸無事飲千金不買辟寒裘
自憐寂寞無玄學車馬門前過似流

越城待旦

策策虛樓竹隔明
悲來輾轉向誰傾
天寒胡鴈出萬里
月落越雞啼四更
為底朱顏成老色
看人青史上新名
清溪白石邨邨有
五尺烏犍託此生

林邨寒食

出門楊柳碧依依
木筆花開客未歸
市遠無錫供熟食
邨深有紵試生衣
寒沙犬逐遊鞍吠
落日鴉銜祭肉飛
聞說舊時春賽罷
家家鼓笛醉成圍

遊陽明一洞天呈王理得諸君

禹穴蒼茫不可探，人傳靈笈鎖煙嵐。
初晴鶴點青邊嶂，欲雨龍移黑處潭。
北斗齋壇天寂寂，東風仙洞草蓊蓊。
堪憐尹叟非闕吏，猶向江南逐老聃。

陪阮使君遊玉几

花滿車茵酒滿船，亂雲堆裏訪枯禪。
林深何處無芳草，人靜有時聞杜鵑。
神屋畫飛青礧磧，靈潭陰罩赤蜿蜒。
居然悟得松風夢，回首廬山二十年。

邑中滯雨示陳貴白

猶及相逢鬢未華故鄉春盡不須嗟園林處處生新草
風雨年年送落花高樹晝寒歸有鳥小溪湍急走如蛇
方知傲世不在隱高枕北窓聞打衙

十月朔旦寄貴白兄弟

黃牛邨前秋葉飛青螺峰外海雲歸故人相思雪滿鬢
客子獨行風舉衣烏鵲定占誰屋喜鱸魚知比去年肥
當時歌酒江湖上百里音書今亦稀

夢覺

夢覺依然一草寮
浮蹤已慣任飄搖
虛簷晴氣生朝露
遠樹寒聲過夜潮
白骨又驚山下滿
朱顏剛向客中消
時平不愛通侯印
且願深林作老樵

次韻和蔚師鑑師春懷

愁是雲陰喜是晴
春遊何處不關情
黃雞亭館琴三弄
青果盃盤酒數行
滿砌雨添新筍密
隔牆風送落花輕
鑑湖湖上樵山老
破帽枯藤過一生

金陵贈友

虎變龍遷此一時春風得似舊城池
宮閑軍賣偷來果寺廢僧尋斷去碑
水水魚肥供白鮓家家蠶熟衣紅絲
太平尚屬窮詩客酒賤如泥醉不知

己卯歲初葺剡居

休言聲跡轉沈淪百折江湖亂後身
窮未賣書留教子飢寧食粥省求人
坐來齒避樵蘇長往處蹤迷木石鄰
翻笑古來逃世者標名先製隱衣巾

秋盡

秋盡空山無處尋
西風吹入鬢華深
十年世事同紈扇
一夜交情到楮衾
骨警如醫知冷熱
詩多當歷記晴陰
無聊最苦梧桐樹
攪動江湖萬里心

同陳養晦兵後過邑

搜山馬退餘春草
避世人歸起夏蟲
破屋煙沙飛颼颼
遺民鬚鬢雪毵毵
青山幾處楊梅隴
白酒誰家櫟柳潭
休學丁仙返遼左
聊同庾老賦江南

正仲今年鄞城之約不就因次韻慰悅之

莫怪詩翁不出山詩多那得是山間清溪欲暖鶯啼樹
白日無人犬卧閑不惜野花簪素髮時憑春酒轉朱顏
當年阮籍何曾達直到途窮始哭還

杖錫寺

仙草漫漫路不分鐘魚那許外間聞涼天九月已飛雪
晴日四山猶帶雲火後客誇新屋樣兵前僧惜舊碑文
藤湖只去招提頂見說漈田可種耘

四明山中逢晴

一岡一澗一縈隈，新歲新晴始此迴。
莎坂南風寅蛤出，茅簷西日乙禽來。
人迷白路羊羣石，水卷青天雪裏雷。
猶是深山有寒食，梨花無數繞巖開。

辛巳歲六月三日書事

急報傳來又不真，門前翁稚笑聲頻。
情懷經苦思平世，顏貌緣愁似老人。
兵後尚多難料事，山中誰是自由身。
沙餅酒醞鮭蔬有，領取鎗花一樹春。

辛丑歲十一月二十六日東歸舟中示三子

節物悠悠不負公江行三日雪花風雲侵賀監山亭白
日在徐仙海島紅自笑得離如病鶴也思結伴附歸鴻
何時辦得邨田活糲飯魚羹百指同

舒子俊見過

來往通家不厭頻青山心性白雲身陰林石溜風傳語
霜月溪梁水寫真歲儉魚鮭難猝致天寒烏鳥自相親
燎鑪新暖槽牀響隨分相留作好春

以家事付諸兒惟不得姑蘇陸氏女子消息

祇憐地僻少過從更許年衰養惰慵行健有時尋近局
起遲嘗日到高春鹿皮冠野頻頻戴鵝頂蔬粗款款供
兒女團藥俱在眼獨憐無信過吳松

兵後復還白巖山所舍作

脫命歸來意恍然餘生堪喜復堪憐財逢亂世真如土
人到窮途始信天問訊比鄰晡饗後呻吟兒女夜鐙前
明朝又作安西計飯後誰家沁雪田

江邨遇九日

去年九月江城角尚得臨風把一杯
今歲并無黃菊看誰家更遣白衣來
身猶是鴈飛難泊時不如潮去解回
還有南山會人意晚舟相對碧崔嵬

送旨上人西湖

一作送砥平石過天竺

并寄鄧善之

聞說西湖也自憐君遊更傍蚤春天
六橋水暖初楊柳三竺山深未杜鵑
舊壁草生尋舊刻新巖茶熟試新泉
城中好友須相覓西蜀遺儒解草玄

剡源詩律雅秀力變宋季餘習五言如春晚鶯羞語
城寒花慢飛鳥巡漁退艇犬認獵歸門定起松鳴屋
吟圓月上身髮從殘歲白山入故鄉青避世書為屋
謀生藥當田後飛紅果嶂人度白雲層七言如新蹤
凍合鶯雖谷舊夢花迷燕子樓老樹背風深拓地野
雲依海細分天水味野栽蒿白瘦山毛人摘芋紅多
締袍涼擁松皮几桂酒春浮藥玉船萬事漸消閑客
夢一生虛白少年頭鄉山雲淡龍移久湖市春寒鶴
下遲甃塹水溫初荇葉粉牆風細欲禁花心如晚
路思家馬身似春筐欲繭蠶其風致多可摘也

蘇李圖

塞北中郎雪滿頭隴西壯士淚沾裘人生百歲能多少
直至如今說未休

湖州二首

山從天目成羣出水傍太湖分港流行遍江南清麗地
人生只合住湖州

一飽懸天不待求幾人乾白少年頭君看滾滾東流水
到海成淵始嬾流

西興馬上

去時風雨客恁恁歸路霜晴水樹紅一抹淡山天上下
馬蹏新出浪花中

蝴蝶

春山處處客思家
淡日邨煙酒旆斜
胡蝶不知人事別
繞牆閑弄紫藤花

夢中作

晴霞冠嶺朝紅潔
新漲連空晚綠酣
惆悵春風倦遊夢
木蘭亭上望淮南

題東玉帥府所藏瀟湘圖

少年魂夢底曾閒
多在江湖煙水間
今日精藍方丈地

倚窓眠看洞庭山

題江干初雪圖

斷樹寒雲古岸隈
漁翁初撥小船開
看渠風雪忙如許
還有魚兒上釣來

銅山寺口初見梅花書寄何則顏

吳歌楚舞送年華
憶著終還不似家
今日春風吹夢醒
銅山寺口見梅花

題趙大年蘆鴈

寒更索索警霜叢兄弟當年意自同猶是江湖太平處
未妨沈著卧秋風

感舊歌者

牡丹紅豆

一作紫

豔春天檀板朱絲錦色牋頭白江南一

尊酒無人知是李龜年

西湖志餘稱戴帥初湖上贈歌者一絕有故國之思焉即此詩

也

桃花寺石臺

臺前藤蘚碧交加臺下清流直又斜待得丹成知幾日

春風隨分野桃花

過姑蘇

水天彌望接青蕪雲氣漫漫近又無
一色好風三百里
挂帆安坐過姑蘇


過鄮山祠塾作

滄江城闕三叉口白日絃歌數畝宮
猶有祠前舊楊柳
向人離立管春風

讀書有感

魯女悲嗟起夜深當年枉却淚沾襟如今已免鄉人笑
老大知無欲嫁心

元詩選初集卷八



總校官候補中書臣吳紹潔

校對官編修臣范衷

謄錄貢生臣張誠智

欽定四庫全書薈要

集部

元詩選初集卷九

十九

詳校官候選知縣臣吳甸華



欽定四庫全書薈要卷二萬三百六十九

集部

元詩選初集卷九

長洲

顧嗣立

編

黃庚月屋漫藁

庚字星甫天台人所著有月屋漫藁其自序曰僕
齟齬時習舉子業何暇為詩自科目不行始得脫

屣場屋放浪湖海凡平生豪放之氣盡發而為詩
若醢雞之出甕天坎蛙之出蹠淦而遊江湖也今
觀其句法如幽居云斜陽明晚浦落葉瘦秋山別



山陰諸友云柳色獨青眼梅花同素心夏夜小酌

云分茶醒酒客添燭了殘棋觀漁云鳴榔舟葉聚

撒網浪花圓病中云氣味如僧淡形容似鶴癯蘭

亭會飲云鐘帶夕陽來遠寺碑和春雨卧平蕪寄

毛素軒云清夜夢分千里月同鄉人各一方天燈

花云自喜結根依小草不愁飛片落蒼苔偶題云

細柳雨中垂綠重殘花風裏亂紅輕清明云浸花

窓下分紅影插柳簷前借綠陰雜咏云耽書自笑

已成癖煮字元來不療飢風月滿懷詩可寫雪霜
侵鬢鏡先知類皆風致清遠用意推敲星甫嘗於
越中詩社試枕易詩推第一名盛於詞場當是時
江南初定遺民故老無所寄興往往發之於吟咏
間時際晏安禁網疎闊騷壇樹幟奔走爭先蔚為
一代文章之盛其所由來者遠矣

漁隱為周仲明賦

一笠戴春雨扁舟寄此情世間塵網密江上釣絲輕不

羨魚蝦利惟尋鷗鷺盟狂奴臺下水猶作漢時清

秋晚山行

鏗然短策聲無事覺身輕落葉山行輒流泉澗飲清蟹
痕沙露濕鴈影夕陽明歸路逢林叟班荆畝隱盟

夜坐即事

對影坐清夜蕭然鬢已華詩慳難就藁燈暗不成花易
醉愁邊酒頻歸夢裏家何時鋤舊圃學種邵平瓜

翠峰菴即事

竟日尋幽處杖藜不憚遙客行黃葉路僧立碧溪橋巖
瀑飛寒雪松風吼夜潮是山皆可隱何用楚辭招

王修竹館舍即事

池館翠涼處寬閒稱客居未仙猶閬苑不夢亦華胥竹
淨堪居鶴荷香欲醉魚心清無箇事長日一編書

贈葛秋巖時寓能仁蘭若

蘭若分清隱秋窓飽看山風霜雙鬢老天地一身閒拄
杖穿雲去吟囊貯月還詩成誰與語時訪竹林間

夜坐即事呈修竹

一有監
簿二字

一室冷於冰秋高夜氣清
月窓攬燭影風葉亂琴聲
寡
慙知身健安貧覺累輕
吟邊閒倚竹誰識此時情

晚春即事

園林芳事歇風雨暗荒城
轉眼青春過臨頭白髮生
嗟
鴟亡國恨歸鶴故鄉情
三逕多荒草東還計未成

春日西園晚步

為愛園林好筇枝伴獨行
花香能醉蝶柳色欲迷鶯
但

得青春在何妨白髮生斜陽紅盡處一抹暮山橫

書所寓

不厭茅廬小棲棲寄此身菊殘如倦客梅瘦似詩人有
地堪藏拙無醫一作方可療貧并州故鄉夢長憶鑑湖春

送別胡汲古

自憐身是客又送客登舟雖有重來約難禁一別愁風
煙迷柳驛草樹暗春洲後夜懷人處山空月滿樓

對竹

門對南鄰竹青青玉萬竿雖然無地種且得隔籬看露
葉晴猶濕風枝夏亦寒但教休翦伐日一作何用報平安

秋色

山陰詩
社中選

憑高望不極望斷動愁情落日淒涼處西風點染成丹
楓明野驛白水浸江城馬上人回首戎戎黯客程

西州即事

一雨洗空碧江城獨倚樓山吞殘日沒水挾斷雲流燈
影深邨夜鐘聲古寺秋西州舊遊地十載此淹留

春日即事

扶杖行幽逕園林欲莫天錦棠紅濯雨絲柳綠縈煙春

事忽三月風光又一年客懷正愁絕

一作客邊
愁正絕

那復聽

嘯鵑

春日

春色濃於酒何須醉玉觴柳疎鶯占影花雜蝶分香往
事隨流水閒愁付夕陽吟邊自歌舞猶學少年狂

書山陰驛

迢遞三山道重來感舊遊潮聲寒帶雨山色淡生秋寄
驛通鄉信題詩記旅愁江湖十年客兩度到西州

宿甘露寺

山險疑無路縈迴一逕通鐘聲寒瀑外塔影夕陽中窓
出茶煙白鑪分葑火紅禪房遇耆舊清話數宵同

王可交昇仙臺

臺在青
龍鎮南

仙翁不可見惟有一空亭地冷春留雪林深晝見星松
篁團秀色蘭蕙吐幽馨立盡斜陽影閒看鶴刷翎

孤鴈

長空獨嘹唳，隱約背斜暉。
塞北離羣遠，江南失侶歸。
度雲憐隻影，照水認雙飛。
却羨投林鳥，相呼入翠微。

和茅亦山韻

愛靜吟成癖，耽書近欲癡。
事多因錯省，節不為貧移。
長物新添畫，生涯舊有詩。
窮通係天命，知命復何疑。

對客

窓下篝燈坐，相看白髮新。
共談為客事，同是異鄉人。
詩

寫梅花月茶煎穀雨春明朝愁遠別離思欲沾巾

林霽山架閣同宿山中

秋風山館客移席近汀前共話忽深夜相看非少年斗
垂天末樹鱗出雨餘天亦有茅簷下飯牛人未眠

別徐敬菊

契闊又兩載光陰一擲梭祇因離別久不覺語言多安
得長留此其如欲去何詩盟終未冷蚤晚更相過

鶴林仙壇寺

古壇歸鶴杳野鹿自成羣嵐氣浮清曉鐘聲出白雲樹
穿僧屋老水到寺門分人世無窮事山中了不聞

旦景

雞鳴起濯髮披衣出戶牖自汲古澗泉落月猶在手三
漱吞朝霞餘光散花柳茲意難語人延佇忽良久

至後

道人坐茅宇獨抱無絃琴對此景物異夕雲散還陰雨
氣一簾潤雲意千山深新陽暢微暄疎花點孤林芳時

坐消歇孰同歲寒心孤梅發清夜庭樹驚棲禽

故相賈秋壑舊府

當年構華屋權勢傾衛霍堂宇窮斧斤天章煥丹腹花
石擬平泉水陸致茲壑惟聞丞相嗔肯後天下樂朱門
鎖荆榛花木已蕭索蒼生顛墮崖國亡身孰託空悲上
蔡犬不返華表鶴丈夫保勲名風采照麟閣胡為一聲
鉦聚鐵鑄此錯回頭莫煙昏不能掩餘恠

潘淑妃

二八入宮掖一笑輕三千雲階渺何許步步生金蓮繡
鞦不勝春風若凌波仙榮華一回首荆棘生我前君恩
花上露妾心井中泉井泉誓不波下照青青天

紀夢是歲大旱

老年屏人事北窓寄高眠夢魂御風去金闕開九天虎
豹獰不嗔知予有仙緣玉座擁五雲香鑪飛紫煙青衣
兩童子舉手導我前下土蟣蝨臣愚哀欲敷宣兵戈幸
休息饑饉方連縣洪惟大生德實司水旱權願言回哀

眷與世解倒懸上帝允臣請乃曰賜豐年再拜謝闕下
回飈墮林泉夜雷聲殷殷甘澤朝滿田沈思喜且驚異
夢非偶然士懷當世憂

闕

貞觀有房杜斗米

三文錢

遊謝仙巖飛霞觀巖下李參政墓

鬼工鑿山骨何年驅六丁飛霞遶石洞縹緲開珠庭永
懷謝仙伯坐斷山水城我來事幽雅登臨委客情松風
驅溽暑自覺毛骨清猿鶴亦仙意人生空營營石麟卧

荒草問是誰家塋
野老對我言其人
昔公卿金玉埋黃
壤送日冠蓋傾興
衰異百年所重非
修名乃知鍾鼎貴
不如薔薇馨所以
世外人返老還孩
嬰倚杖空歎息洞
口雲冥冥

約王琴所不來舟中偶成

清飈卷炎埃碧水
出秋素迢迢見山
亭回首隔煙霧酒
帘颺漁邨笳鼓響
軍戍倚篷問舟人
云是三江路籬落
雞欲棲野水牛已
渡釣翁吹荻煙稚
子收漁具抱琴人

不來殘陽在高樹

種松

去年種松樹未有蒿與蓬今年松漸長埋沒蓬蒿中老
髯何蒼蒼歲華不改容回視蒿與蓬零落悲秋風

讀文相吟歎藁

垂垂大廈顛一木支無力精衛悲滄海銅駝化荆棘英
風傲几礧濱死猶鐵脊血灑沙場秋寒日亦為碧惟留
吟歎編千載光奕奕

古意

庭前有高樹風撓無停枝寒鳥噤不鳴夜半環樹飛託
身未得所三弔情依依高飛犯霜露低飛觸茅茨乾坤
豈不容振羽將安之徘徊戀明月顧影徒傷悲

莫春

芳事闌珊三月時春愁唯有落花知柳絲飄白東風老
一樹斜陽叫子規

海棠

臉暈輕紅酒力微真妃半醉夜深時杜鵑叫落花梢月
獨倚東風睡不知

春陰芍藥

點滴簷聲濕逕雲翻階紅藥帶啼痕可憐花片都零落
雨露雖多不是恩

聞角

誰送寒聲入夢中遙知人在戍樓東明朝梅嶺花飛雪
未必都因昨夜風

晚春

老來無復事狂遊，倚杖看花動客愁。
病骨怯寒春不管，柳棉風裏木棉裘。

一春

新綠園林雨過時，黃鸝無語恨春歸。
楊花怕逐東風去，搭住闌干不肯飛。

江上

江上支筇眼界寬，夕陽影裏水雲寒。
憑誰說與閒鷗鷺，

借我漁磯把釣竿

江景

寒生鴈背天將雪
冷入魚鰓水欲冰
釣艇歸來江路暝
舟人分火點漁燈

莫春二首

東風庭院夕陽天
恨綠愁紅又一年
春自要歸花自落
莫將芳事怨啼鵑

一鳥不啼春寂寂
百花都落雨濛濛
十分花鳥東風恨

半在詩中半酒中

題漂母飯信圖

國士無雙未肯臣
漢皇眼力欠精神
築壇直待追亡後
不及溪邊一婦人

傷春

園林芳事已闌珊
梅未生仁筍未竿
隄上柳棉風脫盡
綠陰應在雨中寒

雨過

雨過山頭雲氣濕潮生渡口岸痕深一聲短笛斜陽外
知有漁舟泊柳陰

書館即事

煙拖野色入書窓一畝平田隔草塘暮雨初收新水滿
藕花香雜稻花香

春寒

春寒料峭透窓紗睡起晴蜂恰報衙怪得曉來風力勁
滿階香雪落梨花

池荷

紅藕花多映碧闌
秋風纔起易彫殘
池塘一段榮枯事
都被沙鷗冷眼看

西湖行春

畫船無復沸笙歌
湖水年年自碧波
回首蘇公隄上柳
綠陰不似舊時多

煬帝行宮

彩鳳樓前汴水流
君王不復錦帆遊
長隄舊日青青柳

曾帶春風拂御舟

采蓮女

越女蘭舟泛綠漪
采蓮花露濕紅衣
萬荷影裏歌聲過
驚起鴛鴦貼水飛

林高士隱居

家住西湖深更深
古松陰裏禮茅君
白猿攀樹藤花落
點破巖前一地雲

半軒疎雨

簷前數點弄晴光
浥露庭花枕簟香
池草夢回詩思杳
吟窓分得一邊涼

見鴈有懷

滿眼西風憶故廬
親朋音問久相疎
年年江上無情鴈
只帶秋來不帶書

中秋對月

十分蟾影照人間
一片山河古影寒
惆悵年年今夜月
人生能得幾回看

九日感懷

新橙初試蟹螯肥一曲清歌酒一卮料得故園秋正好
黃花應怪客歸遲

春夢

銅匱艾納翠氤氲六六屏山酒半醺夢入中州看秦畫
春風吹亂玉梨雲

題明皇按樂圖

五鳳樓前沸管絃春宵花暖月娟娟纖腰舞到霓裳曲

驚起豬龍地上眠

莫景

浮雲開合晚風輕
白鳥飛邊落照明
一曲彩虹橫界斷
南山雷雨北山晴

宮詞

聞說君王御宴回
宮人留鑰內門開
琵琶撥盡黃昏月
不見花間鳳輦來

臨平泊舟

客舟繫纜柳陰傍湖影侵篷夜氣涼萬頃波光搖月碎
一天風露藕花香

錢府舊園

十二峰前富貴家亂離不復舊繁華亭臺寂寂無人到
流水東風自落花

春雨詞

簷聲滴碎玉闌干開盡梨花亦嬾看燕子不歸人寂寞
深深宮殿鎖春寒

山中

萬壑松聲撼翠微
夜寒風露濕人衣
山翁踏月巡幽徑
竹裏籠開鶴未歸

金陵懷古

六宮禾黍千年恨
一片江山萬古情
明月不關興廢事
夜深還照石頭城

山中秋夜

石林彈月鶴聽琴
玉宇凝秋絕點塵
萬里無雲銀漢淡

一天風露濕星辰

春閨

屏山夢斷整雲鬟
金鴨吹香火未殘
背倚闌干聽燕語
一簾風雨卷春寒

秋吟二首

曉逕支筇步屨遲
西風吹露濕秋衣
舉頭凝望青山下
萬里江天一鴈飛

畧約當門石逕斜
槿籬深護野人家
炊煙起處江邨晚

一片斜陽萬點鴉

江邨

極目江天一望賒
寒煙漠漠日西斜
十分秋色無人管
半屬蘆花半蓼花

述懷

故鄉迢遞幾時還
目斷長江杳渺間
一鴈飛邊天萬里
白雲多處是青山

閨情效香奩體三首

金鴨煙銷一字香滿懷春恨強梳妝看花又怕東風惡
偷隔紗窗看海棠

黛眉愁裏斂雙蛾別久無書爭奈何欲待怨他還又憶
怨時較少憶時多

嬾向妝臺對鏡驚羅衣怯薄正春寒黃金絡索珊瑚墜
獨立春風看牡丹

江邨即事

江邨暝色漸淒迷數點殘鴉雜鴈飛鴈宿蘆花鴉宿樹

各分一半夕陽歸

舟次九山

水雲盡處列奇峰
螺髻參差杳靄中
江岸維舟看不了
煙嵐分碧入疎蓬

雜咏

地多種竹堪容鶴
池不栽蓮恐礙魚
小徑荒苔人不到
閉門閒學換鵝書

枕易

越中詩社
試題都魁

古鼎煙銷倦點朱脩然高卧夜寒初四簷寂寂半牀作

憲夢兩鬢蕭蕭一卷書日月冥心知代謝陰陽回首驗

盈虛起來萬象皆吾有收拾乾坤在草廬

考官李侍郎應祈批詩題莫難於枕易自非作家大手筆詎能模寫蓋以其不涉風雲雨露江山花鳥此其所以為難也予閱三十餘卷鮮有全篇純粹正如披沙揀金使人悶悶忽見此作若紛紛盆盎中得古墨洗把玩不忍釋手此詩起句倦字便含睡意頷聯氣象優游殊不費力曲盡枕易之妙頸聯冥心回首四字極其精到結句如萬馬橫奔勢不可遏且有力量全篇體製合法度音調諧宮商三復唱歎此必駮壇老手望見旗鼓已知其為大將也冠冕衆作誰曰不然

棋聲

何處仙翁愛手談
時聞剝啄竹林間
一枰子玉敲雲碎
幾度午窓驚夢殘
緩著應知心路遠
急圍不放耳根閒
爛柯人去收殘局
寂寂空亭石几寒

秋夜

博山香冷夜將闌
紅影搖窓燭未殘
庭樹露濃花氣濕
井梧風老葉聲乾
世情冷暖知心少
朋舊東西會面難
一段客愁吟不就
無言背月倚闌干

秋夜和月山韻

寒夜殘燈照客愁
衾單添盡鵲裘
半窓明月三更夢
一枕西風兩鬢秋
吟骨稜稜寬帶眼
歸心切切望刀頭
何時東籬家山去
獨駕柴車訪伯休

脩竹宴客東園

二月韶光潑眼濃
攜尊宴客小亭東
酒當半醉半醒處
春在輕寒輕暖中
拂檻柳添吟鬢綠
壓闌花妒舞衣紅
晚來聽唱梁州曲
聲繞吳姬扇底風

小酌

小酌園林酒半醺
落紅影裏惜餘春
插花歸去蜂隨帽
傍柳行來鶯避人
白髮尚為千里客
黃金難鑄百年身
何時歸賦滄浪水
浣我征衣萬斛塵

夜坐次林梅山韻

人倚幽窓夜未闌
竹鑪灰

一作火

冷篆煙殘一天露
氣星

辰濕萬壑風聲草
木寒老去客懷多
感慨年來世事轉
艱難何時歸隱孤
山下明月梅花約
共看

有感

自歎文章不遇時平生壯志與心違
十年湖海無家住千里鄉關有夢歸
殘夜月寒燈暈淡高秋天闊鴈聲微
傷今思古愁無奈老淚斑斑濕客衣

雪

片片隨風整復斜飄來老鬢覺添華
江山不夜月千里天地無私玉萬家
迷岸未春飛柳絮前邨破曉壓梅花
羔羊金帳應麕俗自掬冰泉煮石茶

舟次楞蒲廟

短櫂衝寒過浦東，扁舟一葉載詩翁。
斷煙流水殘雲作

鴉外古木荒祠夕，照中吟罷小樓何處笛。
酒醒孤枕半

江風潮生潮落朝，還莫堪歎人

一作浮

生自

一作似

轉蓬

月夜登樓

玉宇澄清莫靄收，吟邊怕倚仲宣樓。
寒蟾千里夜如晝，新鴈一聲天欲秋。
湖海誰青豪傑眼，風霜易白少年頭。
更殘忽聽荒城角，吹老梅花總是愁。

月夜次脩竹韻

徙倚吟闌傍野塘古譙蓮漏滴更長月階夜靜蛩聲切
竹院秋深鶴夢涼坐挹水風侵袂冷眠分花露滿身香
浩歌欲遡明河去醉喚天孫織錦裳

偶書

頻年蹤跡墮江湖三逕苔荒憶舊廬身老方知生計拙
家貧漸覺故人疎松薪拾去朝炊黍漁火分來夜讀書
怨鶴驚猿應待我台山何日賦歸歟

莫春

寂莫園林三月時
客中幾度見春歸
柳眉綠皺鶯無語
花臉紅銷蝶嬾一作倦飛
節物暗催雙鬢老
功名長與寸心違
百年身世成何事
回首西山又落暉

秋夜

十分秋色滿軒窓
景物淒清一作秋深夜氣涼
篩月簾櫳金

鎖碎擣霜砧杵玉
丁當井梧葉脫無
多影巖桂花稠不
斷香坐到更深吟
興動硯池滴露寫
詩狂

題吳實齋北山別業

北山佳景

一作致

勝南山乘興登臨眼界寬樵斧伐雲春

谷暗漁榔敲月夜溪寒一區池占林泉勝四面天開圖

畫看竹屋數間塵不到主人日日凭

一作倚

闌干

書館

池館深深鎖翠涼課餘多暇日偏長屋連湖水琴書潤
窓近花陰筆硯香吾道尚存貧亦樂客身長健老何妨
十年心事閒搔首厭聽蟬聲送夕陽

依綠亭

數椽瀟灑瞰清漪
蕩漾煙霏欲濕衣
闌角寒光搖翡翠
簷牙倒影浸琉璃
荷邊鼓瑟遊魚聽
柳外敲棋睡鷺飛
洗盡紅塵青眼客
臨流何惜賦新詩

秋思

天容凝碧換秋容
殘暑泠然一洗空
梧葉多應愁夜雨
葛衣漸覺怯西風
十分淡冷砧聲外
一片淒涼鴈影中
興動蓴鱸欲歸去
張翰心事恰相同

涼夜即事

涼入虛堂睡思濃
夜深翦盡燭花紅
光搖珠箔梧桐月
香透紗厨茉莉風
欹枕覺來人不寐
撚髭吟罷句難工
小蠻問我詩成未
詩在池塘草夢中

舟行送王琴所之澉州

晨星寥落曙光浮
柳岸風輕送客舟
萬點遠山重疊恨
一江流水淺深愁
淡煙茅店家家曉
白露楓林處處秋
獨倚蓬窗還自笑
此身漂泊媿沙鷗

寄峽山胡府判

鑑湖狂客又西湖
筆硯生涯計已迂
五斗自慚腰可折
四方安得口能糊
家山迢遞鄉心遠
燈火淒涼客影孤
莫誤風前看落鴈
尺書還肯寄來無

次毛一齋韻

詩夢驚殘何處棋
書窓又是夕陽時
柳陰分綠籠琴几

一作岳花片飛紅點硯池
覽鏡自憐添白髮
傳杯不復倩

蛾眉東風故國年年恨
惟有曉春杜宇知

寄月山少監

一片襟懷海樣寬
眉頭肯為別離攢
臂鷹慣識從軍樂
汗馬寧辭行路難
角帶邊聲關月冷
鴈傳鄉信塞雲寒
歸來未許東山卧
見說蒼生望謝安

遊西湖次毛玉田韻

觸目錢塘昨夢非
行春載酒憶當時
花間不碾香輪入
柳外空鞭駿馬飛
落日荒山和靖墓
斷雲流水子胥祠
忘情鷗鷺閒于我
應笑江湖客未歸

故園有懷呈任子宏提舉

十年不作還家夢
荒草深深鎖竹扉
無主落花隨水去
有情嘯鳥勸人歸
儒冠寥落風流減
客路淒涼故舊稀
何日攜琴賦歸去
踏雲自採故山薇

龍江館舍

幽棲俗事不相關
家在青松翠竹間
遶屋四圍都是水
隔林一片不多山
詩篇陶寫清秋景
書冊消磨白日閒
門外沙鷗如舊識
忘機飛去又飛還

俞景仁教諭相過

江雲舒卷弄陰晴
新綠園林似染成
花怯曉風寒蝶夢
柳愁春雨濕鶯聲
棲遲茅屋無塵事
深閉柴門遠俗情
佳客相過慰岑寂
酒邊閒把近詩評

脩竹宴客廣寒遊亭分韻得香字

銀橋疑駕海天長
金粟離離照玉觴
影浸山河瓊殿冷
舞分風露羽衣香
亦知廣莫元無野
却笑溫柔別有鄉
閑折一枝驚昨夢
素娥憐我授玄霜

江上客懷

鏡裏從渠白髮添
吟邊抵掌復掀髯
十年為客甘清苦
一枕忘情付黑甜
短褐怯風棉未絮
破窓漏月紙重粘
梅花應念人孤寂
寒夜吹香入竹簾

偶成簡任肅齋教諭

百歲光陰一轉蓬
晚年不與少年同
事因錯處人方省
詩到窮時句始工
獻賦未逢楊得意
憐才難遇杜司空
有時追憶承平事
猶道繁華是夢中

和杜柳溪韻

白髮垂垂一老夫年來漸覺世情疎
石牀夢冷和雲卧
茅屋燈殘共月居
客至何妨賒魯酒
家貧不肯典唐書
羨君種柳清溪上
借我苔磯學釣魚

漁舍觀梅寄修竹韻

寒雲漠漠護牆陰
瀟灑梅枝出竹林
影落花磯和雪釣
香浮老甕帶春斟
幾憑水驛傳芳信
祇許沙鷗識素心
回首孤山千樹遠
扁舟乘興夢中尋

贈通玄觀唐道士竹鄉

通玄道士苦修行坐見桑田幾變更雲屋苔封燒藥竈
風林花落煮茶鐺休糧賸有青松啖却老應無白髮生
月滿竹鄉騎鶴去欲邀子晉學吹笙

夜宴

醉月飛觴興未闌蓬壺影裏漏聲殘碧浮金鼎香脂煖
紅閃銀臺燭淚乾豔曲喜聽催拍近狂歌自覺入腔難
賞心樂事輸年少一點閒愁了不干

題東山翫月圖

斜陽紅盡莫雲碧一片天光涵水色
海濤擁出爛銀盤千里嬋娟共今夕
主人領客登東山踏碎寒光看秋液
星河倒影浸空明露華溥玉夜氣清
馮夷激水水欲立海若辟易天吳驚
孤舟卷帆泊煙嶼古木撼壑生秋聲
憑高人在金鰲背閒看潮生煙渚外
老龍翻海雲氣寒長鯨卷雪浪花碎
茫茫萬頃滄浪中屹立孤峰鎖蒼翠
山巔埽石羅尊罍賓主傳杯不放杯
騷客掀髯賦詩去

山童踏月攜琴來劇談浩飲不知醉仰天長笑歡顏開
倒著接羅欲起舞乾坤清氣入肺腑天邊風月空四時
眼底江山自千古謝安躡屐遊東山袁宏登舟宴牛渚
庾亮南樓今在不坡仙赤壁知何許滿眼往事轉頭空
千年人物俱塵土人生光景若湍流霜痕易點雙鬢秋
胸中勿著塵俗事眉間休鎖名利愁我輩適意在行樂
古人所以秉燭遊月山追憶舊遊處盡寫風煙入練素
我來見畫如見景想像高唐猶可賦諸君後會應可期

雲萍合散今何之安得扁舟澈川去日與杖屨相追隨
登山把酒醉明月共看此畫歌此詩

醉時歌

茫茫古堪輿何日分九州九州封域如許大僅能著我
胸中愁澆愁須是如澠酒麴波釀盡銀河流貯以倒海
千頃黃金罍酌以傾江萬斛玻瓈舟天為青羅幕月為
白玉鉤月邊天孫織雲錦製成五色蒙茸裘披裘把酒
踏月窟長揖北斗相勸酬一飲一十石一醉三千秋高

卧五城十二樓剛風列列吹酒醒起来披髮騎赤虬大
呼洪崖拉浮丘飛上崑崙山頂頭下視塵寰一培塿揮
斤八極逍遙遊

元詩選初集卷九